

Oqaaseqaatit nalinginnaasut

Namminersornerullutik Oqartussat inunnik, suliffeqarfinnik il.il. inuussutissarsiummik ingerlataqartunik nalunaarsugaasa allanngortinneqarnerannut uiggiullugu pissusissamisoortutut isigineqarsimavoq Inuussutissarsiummik Ingerlataqartunik Nalunaarsuiffiup allaffissornermi nalunaarsuiffittut Naatsorsueqqissaartarfimmiit Naalakkersuisut allaffissornikkut aqutsisoqarfiannut nuunneqarnissaa. Nalunaarsuiffiup allaffissornikkut aqunneqarnera naalakkersuisoqarfimmut Inatsisartut inatsisaanni tassani aalajangersarneqarsimasut malillugit allaffissornikkut aqutsisuusumut suliassanngortinneqassaaq.

Allanngortitsinikkut siunertarineqarpoq paasissutissanik ullumikkut Namminersornerullutik Oqartussat iluanni arlalinni nalunaarsorneqartartunik pitsaanerusumik iluaquteqarsinnaanerup aqutissiuunneqarnissaa.

Nuussisoqassappat soorunalimi pisariaqassaaq Datatilsynip nalunaarsuiffiup nalunaarsuineranut malittarisassaanik nutaanik akuersissuteqarsinnaanissaa.

Inuussutissarsiummik Ingerlataqartunik Nalunaarsuiffik Naalakkersuisut allaffissornikkut aqutsisoqarfiannut nuunneqassappat inatsimmik nalunaarsuinernullu malittarisassanik allanngortitsisoqartariaqarpoq.

Pisortanut aningaasaqarnikkut allaffissornikkullu kingunerisassai.

Nalunaarsuiffiup nuunneqarnerani maannamut nalunaarsuiffiup allaffissorneranut, ingerlatsineranut malinnaasitsineranullu aningaasaliissutaasartut Naatsorsueqqissaartarfimmit naalakkersuisoqarfimmut suliassanut akisussaasumut nuunneqartariaqassapput. Tamakku saniatigut immikkut aningaasaliisoqarnissaa pisariaqartinneqarsorinangilaq.

Naatsorsuutigineqarpoq Naatsorsueqqissaartarfimmit naalakkersuisoqarfimmut suliassanut akisussaasumut nuussinermut atatillugu sulisut ullumikkut Naatsorsueqqissaartarfiup nalunaarsuiffiani sulisuusut nooqataassasut.

Taamaammat siunnersuuteqarnikkut aningaasaliissutinik sulisunilluunniit amerlisitsinissaaq pisariaqassanngilaq siuliinimi taaneqareersutut tamakku suliassat nuunneqarnerannut atatillugu Namminersornerullutik Oqartussat Qitiusumik Aqutsisoqarfianni nuussinikkut aaqqiivigineqartussaammata.

Namminersortunut il.il. aningaasaqarnikkut allaffissornikkullu kingunerisassai.

Sunniuteqassanngilaq.

Avatangiisinut pinngortitamullu tunngatillugu kingunerisassai.

Sunniuteqassanngilaq.

Innuttaasunut allaffissornikkut kingunerisassai.

Sunniuteqassanngilaq.

Allanut pingaarutilimmik kingunerisinnaasai.

Sunniuteqassanngilaq.

Naalagaaffeqatigiinnermut namminersornermullu pissutsit.

Sunniuteqassanngilaq.

Oqartussaasunik kattuffinnillu il.il. tusarniaaneq.

Siunnersuut ulloq 7. juni 2004-mi tusarniaassutigalugu nassiussuunneqarpoq ulloq 16. juni 2004-mut killilerlugu oqaaseqarfigisassanngorlugu.

Siunnersuut Namminersorerullutik Oqartussat qarasaasialeriffiannut, Naatsorsueqqissaartaarfimmut, Naalakkersuisut Allattoqarfiannut, Nunami Namminermi Pissutsinut Allaffimmut aamma Aningaasaqarnermut Pisortaqarfimmut tusarniaassutigalugu nassiussuunneqarpoq.

Nunami Namminermi Pissutsinut Allaffik siunnersuummut ataasiinnarmik oqaaseqaateqarpoq, tassani isorineqarluni Inuussutissarsiummik Ingerlataqartunik Nalunaarsuiffiup Inuussutissarsiormut, Nunalerinermut Suliffeqarnermullu Naalakkersuisoqarfimmut pituttorneqarnissaa, Naalakkersuisoqarfimmi allannngortiterneqarsinnaanerit sillimaffigeqquneqassasoq ammatinneqarusummat.

Naalakkersuisut Allattoqarfiat arlalinnik oqaaseqaateqarsimavoq maannakkut siunnersuummut saqqummiunneqartumut ilanngullugit suliarineqartunik.

Aningaasaqarnermut Pisortaqarfik siunnersuummut oqaaseqaatissaqarsimanngilaq siunnersuut Namminersorerullutik Oqartussanut aningaasaqarnikkut allaffissornikkullu taasarialinnik kinguneqassanngippat, siusinnerusukkullu allaaserineqareersutut taamaappoq.

Namminersorerullutik Oqartussat qarasaasialeriffiat Naatsorsueqqissaartarfillu siunnersuummut oqaaseqaatissaqarsimanngillat.

Aalajangersakkanut ataasiakkaanut oqaaseqaatit

§ 1- imut

Nr. 1-imut

Allanngortitsinikkut Inuussutissarsiummik Ingerlataqartunik Nalunaarsuiffiup ingerlanneqarneranut akisussaaffik Naatsorsueqqissaartarfimmiit Naalakkersuisut allattoqarfiannut nuunneqassaaq. Allaffissornikkut aqutsinerup inissinneqarnissaa suliasaarfinnik agguataarinermut atatillugu naalakkersuisut siulittaasuannit aalajangerneqassaaq.

Nr. 2-mut

Allanngortitsinikkut Inuussutissarsiummik Ingerlataqartunik Nalunaarsuiffiup normuutaanik inatsisilerinermut taamatullu ingerlatsinermut tunngatillugu agguaassisarneq Naatsorsueqqissaartarfimmiit Naalakkersuisoqarfimmut suliasanut akisussaasumut nuunneqassaaq.

Nr. 3-mut

Allanngortitsinikkut qulakkeerneqassaaq Inuussutissarsiummik Ingerlataqartunut Nalunaarsuiffimmut aqutsisoqatigiit imatut katitigaassasut Naatsorsueqqissaartarfimmeersunik taamatullu Naalakkersuisoqarfimmit suliasanut akisussaasuneersunik ilaasortaqaqtussanngorlugit taamaaliornikkut aqutsisoqatigiinni suliamut allaffissornermullu ilisimasat aalaakkaasunngorsinnaaqullugit.

Nr. 4-mut

Allanngortitsinikkut nalunaarsuiffimmi paasissutissanik malinnaasitsinermut akisussaaffik Naatsorsueqqissaartarfimmiit Naalakkersuisoqarfimmut suliasanut akisussaasumut nuunneqassaaq.

Nr. 5-imut

Allanngortitsinikkut qulakkeerneqassaaq naalakkersuisoqarfiup akisussaasup inatsisilerinermut immikkoortotaqarfiit tunngaviumik paasissutissat, §§ 8 aamma 9 naapertorlugit nalunaarsorneqartut malinnaatinneqartullu, pillugit paasiniaavigisinnaalissammagit.

Nr. 6-imut

Allanngortitsineq nalunaarsuiffiup Naatsorsueqqissaartarfimmit Naalackersuisunut nuunneqarnerata kinguneraa.

§ 2-mut

Piffissaq atuutilerfissaa nalunaarsuiffiup pilersaarutigineqartutut tunniunneqarnera peqatigalugu pissaaq.